

**Komunikadu Imprensa**

**Munisípiu Covalima**

**30 Outubro 2017**

## **Estudante Eskola Públiku Nuu-tete Fohorem konsidera treinamento kona-ba Direitu Labarik no Sistema Justisa Formál hanesan bukae ida ba sira**

Iha 27 Outubru 2017, JSMP hala'o treinamento ba estudante sira iha Eskola Ensinu Sekundáriu Públiku Nuu-tete Sub-distritu Fohorem, Munisípiu Suai-Covalima, kona-ba direitu labarik no asesu ba justisa formal.

Treinamento ne'e partisipa hosi estudante 3º Ano Ensino Sekundáriu hamutuk na'in 30, ne'ebé kompostu hosi estudante feto na'in 17 no mane na'in 13.

“Treinamento ne'e hanesan komitmentu ida hosi JSMP hodi kontinua fornese informasaun ba estudante sira iha relasaun ho asesu ba justisa formal liu-liu liga ho direitu labarik nian,” dehan Luis de Oliveira Sampaio, Diretor Ezekutivu JSMP.

Materia ne'ebé apresenta no diskute durante treinamento ne'e sobre asunto sira kona-ba direitu no definisaun direitu labarik, instituisaun relevante sira estadu nian ne'ebé iha obrigasaun atu proteze labarik, protesaun labarik tuir lei nasional no internasional, nomós konseitu kona-ba krime sira ne'ebé akontese hasoru labarik.

Durante treinamento, estudante sira preokupa kona-ba instituisaun estadu sira ne'ebé iha obrigasaun atu proteze labarik sira hosi krime. Tanbá tuir estudante sira hateten katak iha realidade inan aman sira sempre abandona no halo violénsia hasoru labarik ne'ebé tuir lolos sira maka iha obrigasaun atu proteze hosi kualker krime.

Estudante sira mós rekoñese katak durante ne'e sira laiha informasaun ne'ebé naton kona-ba lei sira ne'ebé fó protesaun ba labarik. Tanba ne'e liuhosi treinamento ne'e bele ajuda sira iha koñesementu natoon ba direitu labarik tuir provizaun legál sira iha Timor-Leste. Partisipante sira sente kontente tanba hosi formasaun ne'e bele hasae sira nia koñesimentu ba asuntu sira liga ho direitu labarik nune'e mós sai hanesan referénsia útil no bukae ida ba sira iha futuru.

Aleinde ne'e estudante sira hatudu sira nia vontade atu hatene no pro-ativu hodi hakarak hatene liu kona-ba provisaun sira ne'ebé fó protesaun ba direitu labarik.

Iha parte seluk, Sr. Custodio do Rego, L. Agp, nu'udar Diretor Eskola ba eskola refere, iha abertura haktuir katak, atividade sira hanesan ne'e importante no ajuda tebes estudante sira bele hasae sira nia koñesimentu iha area justisa nian liu-liu liga ho direitu labarik.

Nia subliña liután katak treinamentu ne'e sei iha benefisiu tebes ba estudante sira bainhira estudante sira hakarak aproveita oportunidade loron ida ne'e hodi rona no fó prioridade ba informasaun sira ne'ebé sei apresenta no diskute hamutuk. Tanba ne'e nia enkoraza partisipantes sira atu tuir formasaun ne'e ho konsentrasaun no bainhira la kumpriende bele husu no halo klarifikasiacaun.

Iha sesaun enseramentu nia espresa ninia sentimentu kontente no hato'o agradesimentu wain, tanba JSMP hakarak hili Eskola Públiku Nuu-tete hodi ba fahe informasaun ba estudante sira no rekomenda ba JSMP atu atividade sira hanesan ne'e se posivel bele iha kontinuasaun atu nune'e bele envolve estudante sira hotu iha eskola ne'e.

Treinamentu ne'e ensera ho entrega JSMP *nia brochures*, pareser kona-ba formasaun governu ba Sr. Diretór Eskola refere no hasai foto hamutuk.

Treinamentu ne'e realiza tanba apoiu finanseiru hosi **Embaixada Canada, iha Jakarta Indonézia.**

Atu hetan informasaun klean, favor kontaktu:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.tl](mailto:luis@jsmp.tl)